

Kal Kī Fikr Mat Karo

Injeel : Mattā 6:19-34

[Īsā^(a.s) logoñ ko daulat jamā karne ke baare me batā rahe the. Unhone kahā:] “Tum apne liye zameen par daulat jamā mat karo. Keeḍe aur zaṅg usko barbaad kar deṅge aur chor ghar me ghus kar usko churā le jaaeṅge.⁽¹⁹⁾ Tum apnī daulat ko jannat me jamā karo, jahaan par keeḍe aur zaṅg use barbaad naheen kar sakte aur nā hī chor use churā sakte haiñ.⁽²⁰⁾ Jahaan bhī tumhaarī daulat hogī tumhaarā dil bhī waheen par lagegā.⁽²¹⁾

“Insaan ke jism me roshnī āñkh se ho kar ātī hai. To agar tumhaarī āñkh acchī hai, to tum saaf dekh sakte ho aur tumhaarā purā jism roshnī se bhar jaaegā.⁽²²⁾ Lekin agar tumhaarī āñkh kḥharaab hai aur tum dekh naheen sakte, to tumhaarā purā jism āndhere se bharā huā hogā. Islie agar tum apne āndar ke āndhere ko roshnī samajh rahe ho, to tumhaare āndar kā āndherā kitnā zyaadā hogā.⁽²³⁾

“Tum ek saath do maalikoñ kī kḥhidmat naheen kar sakte. Tum unmeñ se ek ko pasāñd karoge aur dusre se nafrat, yā tum ek kā kahñā maanoge aur dusre kī naafarmaanī karoge. Tum ek saath Allaah taa’alā aur daulat kī kḥhidmat naheen kar sakte!⁽²⁴⁾

“Isī wajah se maiñ tumko bataatā huñ, apnī ziñdagī ke baare me fikr mat karo, ki tum kyā khaaoge aur kyā piyoge tum nā hī apne jism ke baare me socho, ki tum us par kyā pahanoge. Ziñdagī khaane se kaheen zyaadā qeemtī hai aur jism un kapḍoñ se zyaadā qeemtī hai jo tum uspar pahante ho.⁽²⁵⁾ Chiḍiyon ko dekho, wo nā hī fasal ugaatī haiñ, nā hī kaatī haiñ aur nā hī unko godaam me sambhaal kar rakhtī haiñ, balki tumhaarā rab unko khaanā khilaatā hai. Kyā tumko naheen patā ki tumhaarī ahamiyat chiḍiyon se kaheen zyaadā hai?⁽²⁶⁾ Tum zyaadā soch kar bhī apnī lambaai zarā bhī baḍhā naheen paaoge!⁽²⁷⁾

“Aur tum kapḍoñ kī fikr kyuñ karte ho? Tum maidaan me lage in jañglī phuloñ par nazar ḍaalo. Dekho ye kis tarah ugte haiñ. Nā hī ye kaam karte haiñ aur nā hī apne liye kapḍe banaate haiñ.⁽²⁸⁾ Maiñ tumko bataatā huñ, Sulemaan^(a.s) nabī, jo azeem aur ameer baadshaah the, unhone bhī in phuloñ jaise kḥhubsurat kapḍe naheen pahne.⁽²⁹⁾ Allaah rabbul ālameen phuloñ ko kitne kḥhubsurat kapḍe pahanaatā hai jo āj ziñdā haiñ aur kal mar jaaeṅge. Kyā tumhaarā rab tumhaare liye isse zyaadā naheen karegā? Tum logoñ kā īmaan kitnā kamzor hai!⁽³⁰⁾

“To islie tum, pareshaan nā ho aur ye nā kaho, ‘Ham kyā khaayeṅge?’ ‘Ham kyā piyeṅge?’ Yā ‘Ham kyā pahaneṅge?’⁽³¹⁾ Wo log jo Allaah taa’alā ko naheen jaante hameshā in sab cheezoñ ke liye hī pareshaan rahte haiñ. Tum log bilkul bhī pareshaan nā ho, Allaah rabbul azeem sab jaanne waalā hai ki tumheñ kab kis cheez kī zarurat hai.⁽³²⁾ Iske bajaee, hameshā Allaah taa’alā kī saltanat kī kḥhwaahish karo aur use haasil karne ke liye nek ban jao. Tab tumheñ jis cheez kī bhī zarurat hogī to wo tumko kḥhud mil jaaegī.⁽³³⁾

“To islie kal kī fikr nā karo. Har din kī apnī kḥhud kī museebateñ haiñ aur kal kī apnī kḥhud kī pareshaaniyañ.”⁽³⁴⁾